



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

**Küm 5-6 tsüngda RTI Act
ya agientsüa akok: Madan B Lokur**

**Cardiff-i caoch Riza mapa
nungi anentsüogo**

VOL. XXII ISSUE NO. 185 (ADOK 185)

DIMAPUR

AMUNGNÜ SUNDAY

RONGCHII (APRIL) 20, 2025

₹ 5.00

CTAN aser NNQF-i jangjashitsür

Dimapur, April 19, 2025 (TYO): Contractual assistant professors 147 shimokba anema noktakba ya parnok (assistant professors) tazüngba atema masü saka parnok shimokba inyakyim atema lir ta Combined Technical Association of Nagaland (CTAN) aser Nagaland NET Qualified Forum (NNQF)-i jangjashitsüogo.

Nagaland nung Common Educational Services Examination (CESE) agütsütsü atema kaketshir ka NET/PhD qualified asütsüla ta parnoki ashi. Tourism & Higher Education Minister Temjen Imna Along-i department sasep nung backdoor appointments aser regularization indang olen kar jembiba parnoki magizükba metetdaksüogo.

Minister Along-i "special dispensation" indang jembi saka iba ya inyakyim shitak ajanga aniokertem atema dang lir saka contractual assistant professors ya lateta aliba inyakyim ama shimokba masü ta CTAN aser NNQF-i ashi.

Open advertisement melii public appointment asüba ajakji "backdoor appointment" lir ta parnokisa nenshia ashi.

Minister Along-isa Naga

Students' Federation (NSF) aser All Nagaland College Students' Union (ANCSU) den dang iba onük jembitsü ashiba parnoki magizük.

Tang lungkak aitba PhD holders aser aspirants ya NSF aser ANCSU kübok maden ta CTAN aser NNQF-isa metetdaksü.

NSF aser ANCSU dak temulung malemer mesüra parnoki inyakba magizüker ta masü saka shirnok dak tamajungba kongshir ta asübaji tongtipang lir ta CTAN aser NNQF-isa ashi.

CTAN aser NNQF-isa kaketshirtem dang ANGCTA sentong nung madentsü saka kasa anogo parnok ayongzükba sentong nung ang shilem agitsü mepishia metetdaksüogo.

"Onoki nenok atema rarar, nenok tarutsü aser nenok asoshi lenmang lapoktsür. Nenok tsükchir den masü onok den denang. Nenok ajangzüksü" ta CTAN aser NNQF-i kaketshirtem dang ashi.

Parnoki April 21 nü lungkak aitba sentong nung tangatetba shitak aliba sensotem, tsüraburtem aser tesayur inyaksü jangrar ajak adentsü ayongzükogo.

CANSSEA-i AB-PMJAY aser CMHIS tebilemtsü angatetteptsü ayongzüker

Dimapur, April 19, 2025 (TYO): Confederation of All Nagaland State Service Employees Association (CANSSEA)-i state sorkar dang Ayushman Bharat Pradhan Mantri Jan Arogya Yojana (AB-PMJAY) aser Chief Minister Health Insurance Scheme (CMHIS) indang tebilemtsü koktettsü ayongzükogo.

Nagaland nung healthcare delivery system nung tetsükdaksü majurutsü atema CANSSEA-i iba tayongzükba agütsü.

Future Generali India Insurance Co. Ltd (FGI) ajanga ken o tem angatsü mapang agiba ajanga empanelled hospitals nem mapang shitak nung sen magütsüteter ta Nagaland Health Protection Society (NHPS)-i metetdaksüogo.

Nagaland Private Doctors

Association (NPDA)-i April 17, 2025 nungi Nagaland ajungalen Private Empanelled Health Care Providers nung AB-PMJAY aser CMHIS services anenogo.

NPDA-i aiben bangdak ketdangsürtem den ajurutepa sendentem menaka tebilemtsü magientetba agi iba lemtet agi.

State sorkari insurance dak sendakba tebilemtsütem agientsü atema empanelled hospitals yaritsü asoshi temporary financial inyakyim kar tenzüksü ayongzüker ta CANSSEA-isa metetdaksüogo.

Parnokisa Insurance Regulatory and Development Authority of India (IRDAI), Ministry of Finance, GoI, National Health Authority aser Nagaland sorkar dang Future Generali India Insurance Co. Ltd (FGI) den ken o angatetteptsü ayongzükogo.

NSF-i April 21, 2025 sentong nung madentsü tuyur

Dimapur, April 19, 2025 (TYO): Department of Higher Education kübok Assistant Professors 147 regularize asüba pusema April 21, 2025 nü government college tem nung tesayurtem aser kaketshirtemi sentong agitsü ayongzükba nung Naga Students' Federation (NSF) kübok federating units aser subordinate bodies shinga madentsü tetuyuba ka agütsüogo.

NSF-i iba lemtet magizüker

kechiyong iba nung tashishitsü keta lir, tim masüba dena lir aser tajungtem shimtetba anema lir ta parnoki ashi.

Department of Higher Education-i khen atema Assistant Professors mapa nung aniokba magizüker aser iba ya NSF-i mepishia aruba anema lir. Iba inyakyim ajanga Nagaland ajungalen mapa inyaknür meyrjang aika tarutsü raksatsür aser parnok nem temeten magütsür ta NSF-isa

metetdaksüogo.

Iba jagi NSF-i parnok kübok federating units aser subordinate bodies dang government colleges-i ayongzükba sentong nung pei pei züngsemtem medendaksütsü tetuyuba agütsüogo.

Iba Cabinet lemtet meyipa agitsüla aser sanctioned posts ajak Nagaland Public Service Commission (NPSC) nem agüjang ta NSF-isa takhangba agütsüba nenshiogo.

ANCSU-i 'absorption order' meyipa agientsü ayongzüker

Dimapur, April 19, 2025 (TYO): All Nagaland College Students' Union (ANCSU)-ia sangdong ka nung contractual teachers 147 asoshi absorption order meyipa agitsü metetdaksüogo.

Contract nung inyakba tesayurtemi government colleges nung mapa tajung inyaka aruogo aser kaketshirtem sayutetba atema tenüngsang agütsür. Ajisüaka inyakyim alema parnok mapa nung shimokba ajanga mapa bushirtem jashidaksür ta ANCSU-i ashi.

ANCSU-i Nagaland nung Higher Education tashi itshitsü atema onoki teti shiyonga arur. New Education Policy (NEP) aser Four Year Undergraduate Programme (FYUGP) tenzükba ajanga Government colleges nung tesayur peria maliba indang onoki lemsatepa arurogo aser iba atema necessary posts adoktsü aser mapang shitak nung inyakyim lateta aliba ama recruitment asütsü shiditem zülüogo ta parnoki ashi.

Ajisüaka, 2009 nungi inyaka

contractual teachers inyakdakja arur aser tanübo parnok regular teachers dang nungi teimba kümogo aser iba jagi college temi contractual teachers nübo nüngdaksüsa kümogo ta ANCSU-isa metetdaksü.

Kaketshirtem, mapa inyaktsü jangrartem aser shisaliok rejutem akhümket mesamatsü atema state sorkari absorption order meyipa agitsü mepishir aser iba tebilemtsü den sendaktepa alir ajak jaoka lemtet tajung ka agitsü ayongzüker ta ANCSU-isa ashi.

NEHU court nung MP Phangnon Konyak shimok

Dimapur, April 19, 2025 (TYO): India Vice President aser Rajya Sabha Chairman-i Nagaland nungi Rajya Sabha MP S. Phangnon Konyak North-Eastern Hill University (NEHU) court nung züngsem asütsü shimogo.

April 15, 2025 nungi Phangnon Konyak-i NEHU Court nung züngsem ka inyaktsü shimogo ta Rajya Sabha Secretariat-i sangdong ka nung

metetdaksü.

NEHU ya July 19, 1973 nü Parliament indang Act ka ajanga amenok aser North East nung higher education tongtipang reju ka ama arur. Mezüngbo iba reju kübokk Meghalaya aser Nagaland den taoba nung Union Territory ana-Arunachal Pradesh aser Mizoram dena liasü.

Kümtem süia arudang NEHU ajanga Northeast nung shisashiba aser ketdangsübaren nung mapa

tajung inyaka aruogo. Iba reju ajanga shisashirtem, ketdangsürtem public lennirtem aser temelenshi bener arur aika adokdaksüogo.

NEHU court nung züngsem ka asütsü shimba ajanga Rajya Sabha MP S. Phangnon Konyak-i public tenzükba nung bendanga agüja inyakba aser North East nung shisaliok aser terenlok maparen nung shilem agiba kuli agütsür.

ANGCTA aser AIFUCTO-i contractual professors shimokba atema pelar

Dimapur, April 19, 2025 (TYO): Nagaland sorkari Higher Education department kübok contractual assistant professors 147 regularize asüba nungi masetshitsüla ta All Nagaland Government College Teachers' Association (ANGCTA)-i metetdaksüogo.

ANGCTA-i Nagaland chief secretary dangi züluba shidi ka nung contractual teachers pusema aser parnok ya ANGCTA züngsem tajung kaka lir ta shia lir.

Contractual teachers-i itasen

ishika dang nguaka aser külem

tesayurtem dang nungi tajangzük

tajemba nguaka parnoki

tongtipang shilem agiba ajanga

government colleges tajungba

kümogo ta ANGCTA-i ashi.

Sorkari parnok absorb asütsü

lemtetba onoki pusema nungiter

aser parnok mapa nung tamang

akar. Sorkari contractual teachers

dak temulung alemba parnoki Nagaland nung government colleges jenjang tajungba kümdaksütsü asoshi bendanga agütsüshir inyaktsü" ta ANGCTA-isa ashi.

All India Federation of University and College Teachers' Organisations (AIFUCTO)-ia Nagaland state sorkar nem tenüngsang agütsüogo.

AIFUCTO-i chief minister aser Higher Education minister dangi shidi züluba nung state sorkari contractual assistant professors regularize asütsü lemtetba atema tenüngsang agütsü aser parnoki July 6, 2023 nü iba mapa inyaktsü shidi ka zülüa liasü ta shia lir.


"Iba lemtet ajanga Nagaland higher education sector renloktsü amanger" ta AIFUCTO-isa ashi.

April 21, 2025 nü government colleges nung tesayurtem aser

kaketshirtemi sentong ayonga shilem agitsü osang ka metetdaksüogo.

College balala nung tawa regularize asüba Assistant Professors pusema aser state cabinet-i 'one-time dispensation' atema iba lemtet agiba asoshi pelar ta sayua sentong April 21, 2025 nü Government colleges ajak nung sentong ayongzükba agitsü metetdaksüogo.

Iba sentong nung Government colleges nung tesayurtem aser kaketshir ajak adentsü anungji HoDs-i pei pei tesayurtem aser kaketshirtem Hombarne 9:00 ako tashi nung college atong tsü metetdaksür. Mapa inyakdak maliba HoDs-i teacher in-charge ka ama shima iba mapa inyaktsü mepishir ta Kohima Science College Jotsoma Principal Dr. Temjenwabang-i sangdong ka agütsüogo.



HELLO MOKOKCHUNG

THE WHITE OWL BOOK FAIR IS COMING TO YOU!

Mokokchung: April 21-23
Jubilee Memorial College,
Mission Compound,
Aongza Ward

10 AM - 6 PM

- Over 3,000+ titles
- Huge selection of children's books
- 15% off all book sales
- 40% off all Christian literature
- 20% off all book purchases for school libraries
- 15% off bulk pre-orders of Bibles
- Free pins, badges, and bookmarks

Naga nunger artist Vadeo International art exhibition nung dendar



Kohima, Rongchii/April 19 (TYO): Nagaland nungi nungtugu artist Shesalu Vadeo, tang "Echoes from the Spotless Soul" omen nung ajemdaker April 18 nü nungi New Delhi nung agia aliba International group art exhibition (Painting, culture and installation) nung dendar.

Vadeo indang painting aser exhibition nung "Manifestation of a village boy's dream" aser "Hornbill Festival" densema lir. La indang painting ajanga

Naga nunger takar sobaliba sayur.

Exhibition koba April 21 nü tashi agitsü lir, iba exhibition nung Pondicherry, UK, Chattisgarh, Nagaland, New Delhi, Hungary, Kolkata, Uttar Pradesh, Poland, Gujarat, Gurgaon, Bangalore, Chennai, Punjab, Bolivia, San Francisco, Kerala aser Patna nungi national aser international artists 21-i shilem agidar.

Iba exhibition ya Camel den longjemer Luna Arts-i

ayongzükba lir.

Sentong nung Olga Dycheva (Bureau Chief, Rossiya Segodnya/SPUTNIK International News Agency, Embassy of Russia Federation) aser Major General Anukul Chandra, AVSM (Retd) na tongti tejaoker aser Qazi M. Raghib, creative director and art critic and Roop Chand, chairman Roop Chand Institute of Fine Arts and Art Gallery alakteta jaoker liasü.

NMSA-i ozüing alema mapa nung aniokba aitsür

Dimapur, Rongchii/April 19 (TYO): Nagaland Medical Students' Association (NMSA)-i, recruitment inyakyim aser temzüing ozüing anema Department of Higher Education kübok 2024 küm December ita tetuyuba dak ajemdaker Assistant Professor aser Librarian 147 aniokba aser regularize sütsüba aitsür, ta metetdaksüogo.

Iba tetuyuba ya Constitution kübok Article 14 aser 16 nung temeden aser maongka agüja aliba anema lir, koba ajanga temzüing ozüing kübok ajak nem kasa temeden agütsütsü aser public employment nung kasa maongka agütsütsü shia lir.

Iba yagi Nagaland Public Service Commission (NPSC) ajanga temsüa aliba nisungtem shirnok tokteptsü atema renemdar parnok timla samatsür.

Iba amala tia tensa ka nung

NMSA, temsüa aliba aspirants tem den nokdaka lir aser Combined Technical Association of Nagaland (CTAN) aser Nagaland NET Qualified Forum (NNQF)-i kaketshirtem temeden atema kanga tasü ita nokdakba atema parnok nem tenüangsang agütsür, ta kasa sangdong ajanga metetdaksü.

Iba amala ken o ya tang tasen masü aser iba atema süoki ia bilemba NMSA-isa metetdaksüogo.

Tawa inyakyim shitak mebenoki Health Department nung contractual medical officer tem densema contractual posts 280 regularize sütsütsü merangba NMSA-isa bilemtetshia jemi, koba ajanga temsüa aliba candidate tem nungi maongka aginer.

COVID mapang nungi contractual Medical Officer posts 168 ajak NPSC ajanga

shimtsü mepeshir, ta NMSA-i ashi.

NMSA-i ashiba agi, mapa ajak atema NPSC/NSSB kübok ochishia advertisement adoker tatidang agitsüla, kong written examinations aser viva-voce densema alitsü nungdaker. Kija aser telok kecha nema tangar dang nungi alia maongka magütsütsüla.

Backdoor appointment ya ozüing alema aser tim masü aser iba ya magizütsüla. Item ajak dak ajemdaker NMSA-i iba tetuyuba ya agintsü takhangba agütsüogo.

Maneni parnokisa Nagaland sorkar dang iba tetuyuba ya memeno agintsü aser mapa nung regularize sütsüba ajak anena atatsü mepeshiba den mapa tazüing ajak NPSC/NSSB nem agüja tebandang makai ochishia tatidang agir tajungertem shimtsü mepeshia metetdaksüogo.

Kohima Garrison nung Easter mungogo



Dimapur, Rongchii/April 19 (TYO): Easter Sunday amungtsü anogo ka lia Kohima Garrison nung tanurtem atema Chess tetoktepbaka aser tanga jangrademtsü tetoktepbaka tem ayongzükba agiogo.

Garrison nung aliba tanurtem nem benjung tanüla metetdaksütsü aser tangazükba agütsütsü nükjidong nung iba

sentong ya ayongzükba agiogo.

Easter Egg tetoktepbaka nung tanur 56-i shilem agi, shirnoki kang sangra Easter entsütem sentsü aika nüloka decorate süa liasü.

Iba den bendenloksema kasa anogo Chess tetoktepbaka ayongzükba asaya aser iba ajanga lanurtem nem parnok sempet sayatsü atema

maongka tajung agüja liasü.

Sentong ya tetoktepbaka balala nung takok angurtem sempettsüba aser sentong nung shilem agirtem Easter salem lemsatepbaka sülen tembanga liasü. Iba anogo ajanga timla, tepela aser Kohima Garrison telung nung telongjem tashi indang nenshia metetdakja liasü.



OFFICE OF THE
LANGPANGKONG KAKETSHIR MUNGDANG

Langpangkong Students' Conference

H.Q. Chuchuyimlang - 798614, Dist. Mokochung : Nagaland
Email : Langpangkongkaketshirmungdang@gmail.com

Ref. No. LKM/JSS/Fet-08/2025
Date : 19/04/2025

TENÜNGSANG AGÜTSÜR



Langpangkong Kaketshir Mungdang (LKM) H.Q Chuchuyimlang ajanga Langpangkong nunger Sp. Jonathan Rongsen, Rev. Dr. M Rongsen-er japaso-i, Akhoya Yimtak nungi Indian Cricket saisapong nung Tzükongsang er ajak nüma atangtsüsa Khunang tulu bener arunung pa nem Tetushi aser Tenüangsang tulu agütsüba ayimoktsür.

Sp. Jonathan ajanga Naroküm tulu North East Player of the Season (Male) Senior Men's Best Batter ajanteta liasü. Iba khunang Naroküm ya 4th buba North East Cricket Development Committee (NECDC) Achievers' Nite sentong Gangtok, Sikkim nung angu.

Iba Naroküm ya odang anguba masü saka pai 2024-2025 BCCI domestic season küm onsara junga asayaba ajanga angu. Pai tangar ajak dang nungi alia all-rounder ka ama asaya, aser pai 22 ben asayaba nung 769 runs azük. Ibaji dang masü saka wickets 32 tashi agiba ajanga pa dak senpet balaka alibaji ajitetter.

Pai otsü-sütsü sa asayatetba-ji Ranji Trophy nung runs 225 azükba aser ano Vijay Hazare Trophy nung runs 109 azükba ajanga iba khunang Naga nunger nem dang masü saka Tzükongsang er ajak nüma atangtsüsa bener arutsüba lir.

Sp. Jonathan ajanga iba Khunang tulu ngutetba ya Langpangkong nunger asayar Lanurtem asoshi teyimla tulu ka yutsür asütsü. LKM Mungdangti ajanga maneni iba takok asoshi pa nem tetushi tulu agütsür aser tarutsü nunga yamai meranga asayatsü asoshi pa aser lanur asayartem ajak ajungshir.

Tsüngrem-i pa taküm wadang ajak nung takok agüjangma ta LKM sarasadem.

IMLINOK
PRESIDENT LKM

MEYITONGPANG
GENERAL SECRETARY LKM

CHC Chiephobozou nung World Oral Health Month amung



Dimapur, Rongchii/April 19 (TYO): World Oral Health Month amungba nungdem nung Kohima district kübok Community Health Centre (CHC), Chiephobozou nung April 16 nü oral health awareness sentong balala ayongzükba agiogo.

Iba sentong ya "A Happy Mouth is a Happy Mind" omen nung ajemdaker Dental Surgeon Dr. Asezo Sekhose lenisüba nung agia liasü.

Ita tepeyong Dr. Sekhose aser pai aniba team-i Kohima kübok school balala aser orphanage ka nung oral health camps ayongzükba agiogo. Camp tem ayongzükba agiba mapang oral screening, fluoride application aser tenüngdakba dental extractions tem benoka inyakogo aser iba ajanga tanur aser kaketshirtem aika ajangzükba liasü.

Sentong nungsa tebang merekmejua alitsü koda tongtibang iba indang tangazükba agütsü, kong tepu meyuba yimya tim sayuba den moko achiba ajanga timtem adodaksüba indang tangazükba

agütsüba densema liasü.

Kasa mapang nung yimya balaka ajanga tangazükba agütsütsü nükjidong nung kaketshirtem atema painting tetoktepbaka ka ayongzüktsü aser iba ajanga noksa agi oral health indang parnok tebilemba lemsateptsü maongka agüja liasü.

Iba den bendeloksema Chiephobozou block nung ASHA workers, Community Health Officers (CHOs), Anganwadi worker, aser councillor tem atema awareness session tem agongzükba katsüogo.

Sessions balala ayongzükba agiba mapang oral hygiene dak dang rangloker masü saka oral cancer indanga tangazükba agütsüogo, koba tashidak takaratiba nung puteta nokdangtsü nükjidong nung agiba liasü.

Maneni Dr. Asezo Sekhose-i, camp nung shilem agiba institution aser stakeholder ajak dang kanga pelaba lemsatepbaka den, oral health ajungkettsü atema ajak longjemer inyaktsü koda tongtibang iba indang lemsatepogo.



Hyderabad, April 19, 2025: Good Friday nü Hyderabad nung Khristantemi Yisu Khristai Kangki apur jajaba jilushi sayudang tangokba noksa nung angur.

Küm 5-6 tsüngda RTI Act ya agientsüa akok: Madan B Lokur

New Delhi, Rongjui/April 19 (Agencies): Sorkari RTI Act dak sendakba nung menüngdakba ozüing yanglushia aruba apibo iba Act ya taruba küm pongu-trok tsüngda agientsüa akok, ta taoba mapang Supreme Court nung judge, Justice Madan B. Lokur-i metetdaksü.

Sentong ka nung jembidang pai, iba Act nung yanglushiba ozüingtem ajanga sorkar ketdangsertem aibelen aziüoktsü atema nüburtem nem tashi agüja aliba tashi meiti kümdaktsür aser teladak inyakyim jenjang tamajungba kümdaktsür, ta ashi.

Paisa nüburtem dang tawa RTI nung yanglushiba ozüingtem anema ola adoktsü ayongkzüikba den külemi pai, sorkari Digital Personal Data Protection Act, 2023 ajanga itemji benoktsü meranger, ta metetdaksü.

DPDP Act, 2023 kübok Section 44(3) ajanga RTI Act, 2005 kübok aliba Section 8(1)(j) yanglushir. Ibaji ajanga nija dak sendakba osangtem lemsatepba nokdangtsü.

Ibaji ajanga RTI Act tashi meiti kümdaktsütsü, ta shia Justice Lokur-i, apu ka chirep saka ketdangsertemi contractor tenüngji sangdongtsü memelunger, ta ashi.

"Nai contractor tenüngji memettra shiba anema ken o benoktsü?" ta Justice Lokur-i ashi.

"RTI Act tashi meiti kümdaktsütsü atema tesüiba küm 10-15 tsüngda merangogo. Linük tesem ajaklen information commissioners (ICs) mapa tazüing aika lir, ajisüaka iba ozüing tashimait kümdaktsütsü atema parnoki information commissioners meshimer.

Sorkari taruba küm 5-6 tsüngda RTI Act agientsüa akok," ta pai ashi.

Paisa, sorkari chief information commissioner (CIC) aser ICs shimba inyakyima melenshitsüa akok; CIC aser ICs kümsük küm pongu liasü, ajisüaka 2019 küm RTI Act yanglushiba sülen kümsükji küm asem dang kümtsüogo, metetdaksü.

Kasa sentong nungji Justice Lokur-i "Report Card of Information Commissions in India, 2023-24" study semzükja liasü. Iba report ya Satark Nagrik Sangathan-i renemba lir.

Information Commissions 29 nung ken o 4,05,509 anendaka lir aser mapang shidak nung Information Commissioners menden tazüing atema nübo meshimra ano ken o teimba bendenloktsü, ta Justice Lokur-i ashi.

Jagdeep Dhankhar-i SC anema jembiba atema opposition pa aitsür

New Delhi, April 19 (Agencies): Tawa linük tatong Tir, Jagdeep Dhankhar-i judiciary aitsüba atema opposition party temi pa sashia aitsüogo.

Dhankhar-i linük temzüing kübok Arrla 142 nung ajemdaker Supreme Court aitsü aser bill tem agizüktsü atema Supreme Court-i Tir nem mapang latettsüba atema court aija liasü.

Congress lenir tain, Randeep Singh Surjewala-i, "Supreme Court-i mapang shidak nung tasü itta obendang shidak agütsüogo. Asen democracy linük nung India temzüingjisa tulutiba. Judiciary nem jurila tashi agütsüba ya atangji

'nuclear missile' amai lir aser ibaji ajanga tim masüba aser tashi tim masüba nung amshiba songtemer," ta ashi.

Tirtem aser Governor tem tashi mita mereprangra ibaji ajanga legislatures tashimait kümdaktsütsü, ta paisa metetdaksü.

Ano Trinamool Congress MP, Kalyan Banerjee-ia Dhankar aija, tatong Tiri mapang shia judiciary anema jembir; temaba menden ka nung alir kati iba ama o jembitsü ta meimlai liasü, ta metetdaksü.

Paisa, "Pa India tatong Tir menden nung maneni alitsü metemsü. Pai asen linük nung democracy tongti pezü

rongnung ka anema inyaksü makok," ta ashi.

Rajya Sabha MP aser senior advocate Kapil Sibal-i, "Dhankar-i jembiba o ajanga jashir aser süngmanger. Talisa Arrla 142 aser nuclear missile na medemdangbaji mamangteter," ta ashi.

Paisa, judiciary ya kanga tamang katetba rejutem rongnung ka lir, ajisüaka sorkari yimtenren nung ajemdaker court obendangtem magizükteter, ta ashi.

Paisa, Arrla 142 ajanga ochi temeden agütsütsü asoshi Supreme Court nem tashi agüja lir, ta ashiba den külemi tatong Tiri SC obendang balala ashishiba atema aitsü.

US nung kaketshirtem visa thinentsüba 50% bo India nunger lir

New Delhi, April 19 (Agencies): United States nung International kaketshirtem visa aika thinentsüogo, aser iba nungjagi shilem 50 bo India nunger kaketshirtem visa lir.

American Immigration Lawyers Association (AILA)-i, tawa parnoki international students indang visa thinentsüba nungi shilem 50 bo India nungi lir, ta metetdaksü.

Trump administration tetuyuba kübok bendanger kaketshirtem mita reprangba nung ajemdaker kaketshirtem indang visa aika thinentsüogo, ta Student and Exchange Visitor Information System (SEVIS) records nung shia lir.

AILA-isa, item kaketshir shilem 50 bo Optional Practical Training (OPT) kübok lir; tetezü parnok graduate süogo aser US tesem balala nung mapa inyaktertem lir.

2023-24 kümsük nung US nung international students teimtibaji India nungertem liasü. 2023-24 kümsük nung United States nung international students 11,26,690 nungi kaketshir 3,31,602 (shilem 29) bo India nungertem liasü; iba sülen tanabuba jenjang nung China nunger kaketshirtem lakh 2.77 liasü (shilem 14).

Iba osang dak sendakba

Brihostibarnü osangbenertem den jembidang Ministry of External Affairs (MEA) otongdar, Randhir Jaiswal-i, India sorkari item kaketshirtem yaritsü atema parnok den tongtepratepa inyakdar, ta metetdaksü.

US immigration policy kübok OPT period ajanga US nung F1 Visa alir international students ita 12 tashi mapa inyaksü melar, aser science, technology, engineering & mathematics (STEM) kaketshirtembo ano ita 24 tashi atsülangtsür.

2023-24 kümsük nung India nunger kaketshir lakh 3.32 nungjagi 97,556 bo Optional Practical Training (OPT) kübok liasü.

Item osang dak sendakba nung Congress lenir Jairam Ramesh-i X ajanga, "Yashi American Immigration Lawyers Association-i sangdongba osangji India atema tebilemtsü onük ka lir. International visa thinentsüba tatalokba 327 nungi shilem 50 bo India nunger kaketshirtem indang lir. Visa thinentsüba kulitemji mapet aser kuli tejangja masü. Iba ya ajanga kaketshirtem tsübudaktsür. External Affairs Minister Dr S Jaishankar-i iba onük atema US Foreign Minister den jembia inyaksü asü?" ta metetdaksü.

Bangladesh nung Hindu nunger lenir ka tepsetba India-i aitsür



Bhabesh Chandra Roy

New Delhi, April 19 (Agencies): Bangladesh nung Hindu nunger lenir ka puer oa tepsetba sülen Honibarnü India-i Bangladesh nung Muhammed Yunus-i aniba interim sorkar dang linük nung Hindu nunger densema minorities ajak kümzükttsü nenshia metetdaksü.

Ministry of External Affairs otongdar, Randhir Jaiswal-i sangdong ka ajanga, "Bangladesh nung Hindu nunger lenir Bhabesh Chandra Roy puer oa tepsetba osang onoki angazükogo. Interim sorkar yimsüsüba kübok nütsüing ajema aliba Hindu nungertem kanga reshikangshiba mapang ka nung lenir tepseter, aser aibelenertem nem temerenshi magütsüba ajanga parnok sademsadema senzür," ta metetdaksü.

Jaiswal-isa, "Onoki iba

tatalokba sashia aitsür aser interim sorkar dang Hindu nunger densema nütsüing ajema aliba nüburtem kümzükttsü atema inyangang, ta maneni lephsia metetdaksür," ta metetdaksü.

Yaküm Bangladesh yimtiba, Dhaka nung Hindu nunger putir Chinmoy Krishna Das apuba mapang nungi India-i Bangladesh dang nütsüing ajema aliba nüburtem kümzükttsü atema inyangang, ta mepishia arudar.

Osang angazükba agi, arrshi küm 58 Hindu nunger lenir, Bhabesh Chandra Roy ji Brihostibar aonung süchia oor angu.

Roy puer aoba sülen Narabari yimda pa dak kanga mejungi azük, iba sülen pa kidangi meyipa yok. Kiyongertemi pa hospital-i anir ao, saka doctor temi pa süadoker atong ta ashi.



National Herald ken o dak sendakba nung April 19, 2025 nü New Delhi nung Bharatiya Janata Yuva Morcha (BJYM) züingsemtemi Congress lenirtem anema longkak aitba noksa



TIR YIMYIM YIMOBILEM (EDITORIAL)

DIMAPUR SUNDAY, APRIL (RONGCHII) 20, 2025

Kibubaer Anogo

Asenoki ajuruba anogo tasen ajak ya Kibubai yanglutsüba anogo lir, ajisüaka item anogotem rongnunga Hopta mezüing nü, koba anepdang Yisu tasü nungi shia aru, iba Deobar anogo dang ya Kibubaer Anogo, Lord's Day, ta ajar. Asenok asoshibo Deobar Kibubaer anogo ya anogo trok mapa inyaka monger tenetnübuba kecha meinyaki amongtsü asoshi Tsüngremi Mosa dang Anitet 31:5 nung shia aliba anogo to masü, saka Hopta nung anogo tenetnübubajibo Honibar anogo lir aser Yihuda nungertemi iba anisüngzüka amungba anogo dang Sabbath ta ajar. Ibayongji, Yihuda nungertemi parnok Sabbath amongba Temeshi amongnü anogo memenentsü atema hopta tenzüker anogo troknübuba nungsa Yisu tepset aser Pilate-ia Arimathia nunger Yosef nem Yisu mang agütsü, anungji Nikodima tenati kasa anogo nungjisa rema yutsüba otsü Yohan 19 nung shia angur. Aji oda, Yisu tepseter sülen anogo asemnübubaji hotpa mezüingnü liasü, anungji iba anogo ya shitakba agibo anogo troknü mapa inyaka monger anisüngzüka anogo masü saka anisüngzüka Sabbath monger hopta tasen tenzüka anogo liasü. Ibayongji, Laishiba nung Osangtajung kakettem ajak nung Hopta mezüingnü Yisu shia aruba indang shia angütsü. Tanü alima kintem ajaki agizükteta amshiba Gregorian Calendar ya Hebrew (Ibri) calendar nungi agizüka latetba zonizüing (calendar) ka lir. Ibayongji, anogo züing tenzüka aser atemba ajakji kasasa alima ajak nung amshiteter. Aji oda, Tsüngremi Israel nungertem dang anogo trok mapa inyaker tenetnübuba anisüngzüka amongtsü latettsüba anogo Sabbath tobo yashi Yihuda nungertemi mungogo aser tanü yabo hopta tasen tenzüka 'Sunday' anogo lir. Ajisüaka, Yisu asü aser shia aruba ajanga Yisu dak amangertem asoshibo Ibri calendar nung aliba Hopta mezüingnüjiang tenetnübuba amato kümer mapa meinyak Tsüngrem külema anisüngzüka amonger. Ibayongji, Khristantem asoshi hopta mezüingnü Deobar anogo ya Yisu shia aruba bilemteta amungba anogo lir. Aji oda, Yisu shia arur kotaki orr külen alima nung Pai toktsür aoba kuliser tenyarterm den mezüing amongba purtem asoshi Yisu dak mamanger Yihuda nungertem den külemi hopta nung anogo tenetnübuba nung Sabbath anogomung külemi Synagogue nung amongtsübaji mekoki aküm, anungji amongba purtemji Yisu shia aruba anogo, hopta nung mezüingnü amongba pur kidang dang sentep agi tenzüka otsü ka asenoki Tenyar Mapa 20:7 nung shia angütsü. Iba nung jagi tenzüker Khristantem asoshibo anisüngzüka anogoji hopta nung mezüingnü aküm, kechiyong iba anogo aru shia Khristantemi parnok tanela tesama tia nungi kümzüksang aser alima ozüing tamajungtem nungi salatsüsang Yisu Khrista tasü madak shia aruba anogo aser taochi mapatem bilemtet. Aji oda, asenok asoshi Deobar anogo ya Yisu Shia aruba anogo bilemteta amungba Temeshi anogo lir. Anungji, asenokbo anogo trok mapa inyaker tenetnübuba asüba agi Deobar anogo nung ya anisüngzüka amunger masü saka küm 2000 dak tali ogo, iba anogo nung ya Yisu Khrista tasü madak takok ngur shia aruba agi " Yisu shia aruba anogo bilemtetmung" küma amonger. Ibayongji, tanübo akhi tejen Lai mapang amungba Sabbath anogo ya Khristantemibo mamunger saka Khristantem asoshibo hopta mezüingnüjiang tenetnübuba kümer Kibubaer Anogo amunger. Yisu aruba ajanga Mosa mapang amshia aliba ozüing agiener taochi agi nisungtem sobaliba anogotem aser mapang dena melenshibaji Deobar anogo anisüngzükmung akümba ya ka asütsü. Aji oda, tanü ya asenok ajak asoshi Tsüngrem chir tasü madak takok ngur shia aruba anogo bilemteta amungba temoatsü Easter Sunday anogo lir. Iba anogo yabo, Sabbath ama shi temang anisüngzüka amungba anogo dang masü saka shia aruba Kümtetdakba Kibur Yisu Khrista külema amungba anogo lir. Atangji, Kibubaer Anogo nung temoatsü sentepibo ajak aotsüla ta ozüing magütsür aser sentepi ao nung dang kotaki aotsü ta masü saka tamangertem külemi telongjem ka ser ken tena sarasademba aser Tsüngrem o lemsatepba nung temoatsü talila aika angur. Aji oda, tamanger telongjem nung madenba nisungji, ashiko, Toma ama, Tsüngremer tanelai semdangba mapang malitsüa akok . Iba tangatetba nung Hopta mezüingnü shia Yisu shia aruba anogo bilemteta amungba tamanger telongjem temoatsü sentep nung atentsübaji Yisu dak amanger shiai yongyaa atatsüla. Yangji tashi, temoatsü aser Teimla angur .

OLEMSABANG

LOKTILIBA YA SHIRNOKI RAKSAR ASER SHIRNOKI YANGLUR ?

~ L. Kika Pongener.

Tanü asen lima nung loktiliba ajak nung kechi kuli ajanga telongjem raksatsür (?)....ta kanga junga shisadangra, lokti-tentet ajak nung telongjem raksatsüba kuli kar lir....Item kulitemji bushidangra kanga tongtipang kar....Mezüingbuba nung tanishir menden (Leadership) raktepba agi lokti ka raksatsür. Tanabuba nung külem züingsem rongnung tanak-temesung, tulur-tilar, takar-sensaker, tashir-mashir bendanga benshiba (Partiality) agi lokti nung telemsa adokdaksür. Tasembuba nung lennirtemi rongsen ketdangsuba nung ochimashi ketdangsua amshiba agi lokti nung temulong melemtep aser mepetmesu adokdaksür aser tesendaktep raksatsür. Pezübuba nung lennirtemi lokti ajungtsü asoshi masü, saka pei ajungtsü asoshi bilema yangkü semer tenzüka agi loktiji raksatsür. Kanga tesasatsüka, tanü asen lima nung lokti-tentet aika nung rongsen ketdangsuba nung kanga ochimashi amshiteper. Lokti rongsenji ta ser tapayu mali lalushiponga amshiteper, sen noklang-ka agi peritsüba mapa nung sen merijang menden tashi endoker. Lokti rongsenji ta ser chidiyungdi nung teimba endoker aser kwika sanction asür terakata tanüingba mali paikaji endoker. Atangji, tanü loktiliba aika nung lokti rongsen agi ochimashir ketdangser kar dang ajanzüker.

Surabangla, tanü loktiliba raksaa aliba yanglushir ya shirnok asüsu....??? Shirnoki pei atenba lokti nung, pei nem nungloktsüba mapa ajak nung, pei ajungtsü atema mepushi-i ochishia, indang-indanga tenzüker aser inyaker parnok dangji lokti yanglur ta ajatsü. Shirnoki lokti rongsen ketdangsuba mapa nung ochishia tashishitsü aser tajitettsü meli-i meshi-meshia aser meruk-meruka tamang kaatettsüsa aser temulong lemtettsüsa inyaker parnok dangji lokti yanglur ta ajatsü. Shirnoki lokti benjong-bentsü aser anganuba mapa nung yangkü semer mawazür aser pei ajungtsü mebushir parnok dangji lokti yanglur ta ajatsü. Shirnoki nungsen metsübui odi-odia tim masüba aser meshitakba nungpo, yabo tim masüa aser meshitaka ta arrtsür aser metongshitsür parnok dangji lokti yanglur ta ajatsü. Kanga-sa tesasatsüka, tanü asen lokti nung tenzüker aikati konang-nungsangpo aginur, taki-tarutsü nungpo tama rakteper...Saka ken o tasak arudangpo nungsen maginuba agi ola madoker, atsüingina atar, mesura medeni paizüka jena aor....Iba amala lennir jagi loktiji tamakok aludaksür, rajang kümdaksür, tejakleni moodaksür aser sudaksür.

Tesasatsüka, tanü asen lokti nung tenzüker aikati pei madak lennir aser külem tenzükeri aibelendang yabo tim masüa, majunga aser meshitaka ta indang-indanga metongshitsütsü melena, meyiper anemsa agi majung/meshitak sernung junger/shitaka ta tenungsang agütsür....Saka kipok nungpo nungsen tapu-tapu jembia nemnemer....Iba amala mesukba tenzüker aika aliba agi tanü asen lokti rajang kümdaksür aser teraksa ya meyanglushir aser memelenshir. Tanü asen lokti nung iba amala anemsa jakla atenba tenzüker-jibo küm aika sodi magütsüi tenzükdaksür....Saka shirnoki tim masüba aser meshitakba nungpo odi-odia aser indang-indanga arrtsüa metongshitsür parnokjibo lokti nungi agiena tezülen ayutsü meranger.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristantemi 'Jaat' film nokdangtsü takhangba agütsü



Khristantemi 'Jaat' film nung ashishiba 'scene' noksa nung angur.

April 19, 2025: 'Jaat' Hindi film nung Khristantem melung yirutsütsüsa 'scene' ka lir, ta shia Khristantemi iba film nokdangtsü atema takhangba agütsü.

Iba film nungji Sunny Deol aser Randeep Hooda nati tongti shilem agia lir.

Iba film nungji scene ka nung Yisu Kangki nung metaba shilem lir, aser ibaji ajanga Kibuba Yisu Khrista atalar aser Khristantem temelung yirutsür, ta Khristantemi metetdaksü.

Hokolbarnü iba film yanglurtemi sangdong ka ajanga, "Iba film nung scene ka ashishia aitsüogo, anungji onoki film nungjagi iba scene ji agienogo," ta metetdaksü.

Parnokisa, "Iba film nung scene ji tamangar kar melung yirutsütsü nükjidong nung tangokba masü. Onoki iba atemaji kanga sasar aser tekeraba nung iba scene ji agienadokogo. Nisung kar danga melung yiruja lira onoki tatok meshir," ta metetdaksü.

Jalandhar kübok Pholdiwal yimdak nisung ka tenüng agi Vikalp Gold-i Jalandhar nung aliba Sadar Police Station nung Bharatiya Nyaya Sanhita (BNS) kübok Arrla 299 nung ajemdaker film actors Sunny Deol, Randeep Hooda, Vineet Kumar Singh, film director Gopichand Malineni aser producer Naveen Yerneni nunger anema ken o ka benokogo.

Chhattisgarh nung Khristantem temeden atema SC nung ken o benoktsü

April 19, 2025: Ita ishika tejaklen Chhattisgarh nung pastor ka asüba sülen tasü mangji arem tsü memelaba ajanga par jabaso, Ramesh Baghel-i timtem ajangshia liasü.

Ramesh-i state nung Khristantem tasü mang arem tsü temeden meshia asentenshir Supreme Court nung ken o tasen ka benoktsü.

Ita ana ser tesimal tejaklen Supreme Court-i Chhattisgarh state sorkar dang, state tesem balala nung Khristantem tasü mang arem tsü atema March 27 anogo tashi nung Khristantem leper atema ali lezmükjang ta tuyua liasü, ajisüaka tang tashi sorkar ketdangsertemi Khristantem mang arem tsü atema ali melezmüktsür.

Osangbener den jembidang Ramesh-i, "Joko iba ya kübu dak sendakba onük ka masü saka Chhattisgarh nung Khristantem ajak akhümket aser temeden atema lir. Khristantemi maneni iba timtem ajangshir. Ni maneni Supreme Court ajurua temepishiba ken o agütsütsü, kechiyong court tetuyuba aser onok yimsü naprongla akhüm tsübütsü atema bangzüng ka nüngdaker," ta metetdaksü.

Ramesh Baghel tebu, Pastor Subhash Baghel süadokba sülen tasü mang arem tsü atema pai

hopta asem tashi okadak rara arua liasü.

Chhattisgarh nung talisa tribal nütsüng aliba tesemtem nung Khristantem kanga reshikangshir, yimdak nungi meindoker, loktiliba nung sendoker aser tasü mang arem tsü atema temelaba magütsür.

State nung Khristan lenir ka aser Pastor Salim Hakku-i, "Chhattisgarh nung Khristantemi asürtem nem akhüm agütsütsü atema akhanger, aser iba temedenji Supreme Court-ia agütsüogo, ajisüaka tanü tashi sorkar ketdangsertemi iba temedenji magütsür. Iba ya ajanga ozü nüburtem bendangshidanga züngshiba sayur," ta metetdaksü.

Pastor Subhash Baghel taküm January 7 nü Jagdalpur nung aliba Baliram Kashyap Memorial Government Medical College hospital nung asüba sülen par jabaso Ramesh Baghel-i tasü mangji yimdak leper nung arem tsü sentong liasü, ajisüaka yimdaklirtemi nokdangba sülen pai court nung ken o benok.

January 7 nikongdang Sarva Adivasi Samaj aser Bharatiya Janata Party (BJP) züngsemtem Ramesh Baghel'er kidangi oa pa dang yimdak tasü mang arem tsü memelar, ta ashi.

April 10 nü iba film sayaba sülen Khristantemi iba film nung scene ka kanga ashishia liasü. Film nung aliba scene ka nung Tenla kidang nisung kar sarasademba mapang nung temeshi sabanglen Kangki kübok Randeep Hooda nokdaka adoker.

Iba film ashishia ken o benoksangi, "Film director, otsü zülusang aser producer temi Good Friday aser Easter amongba temeshi ita nung metetsü monga iba film sayaogo, aser ibaji Khristantem jashidaksütsü aser linük tesem ajaklen tesü nep raksatsütsü nükjidong nung inyakba lir," ta shia iba film nokdangtsü takhangba agütsü.

Tamalen iba leper nungji Khristan 20 shibo remogo. 2007 küm Pastor Baghel tebu, 2015 küm par aianu ka aser 2013 küm par kinünger ana tasü mang remogo, ajisüaka taküm pastor asüba sülen pa tasü mang arem tsübo memela.

Chhindwada yimdak nütsüng 6,450 shi lir aser iba nungjagi Khristantembo 100 shi dang lir.

Pastor tasü mang arem tsü memelaba sülen Ramesh Baghel-i Chhattisgarh High Court nung ken o benok, ajisüaka court-i ken oji magizüki liasü.

Iba sülen pai Supreme Court nung temepishiba ken o agütsü. Hopta asem tashi pastor tasü mangji hospital mortuary nung ayuba sülen January 27 ayaterm nung yimdak nungi mile 25 shi pilar Karkapal nung ang tasü mangji arem.

Chhattisgarh state kübok Bastar region tesem ajaklen Khristantemi timtem aika ajangshir. 1933 küm mezüng Jagdalpur nung Tenla ki asü aser tesü iba küm 90 tejaklen nungi region nung Khristantem lir, ajisüaka tang tashi Khristantem reshikangshir.

Bastar district nung nütsüng shilem 1.98 (27,951) dang Khristantem lir saka Jagdalpur yimti nungbo nütsüng shilem 9.44 Khristantem lir.

ANOGO ABEN TSÜNGREM DEN

NENOK LENMANGTEM BILEMDANGANG

Jamai Temaranger Kibubai ashir, "Nenok lenmangtem bilemdangang." Hagai 1:7

Vihuda nungertem tepuokdak nungi shilanger joko mapang tatsüka Yirusalem nung lia arudang parnoki Virusalem nung tenlaki raksa-a alibaji meyanglushi-i hasü. Anungji, Hagai ainkari lenirtem dang tenlaki yanglushitsü parnok dang sangdong. Pai ashi, "Iba ki teraksa yutsür nenok taktang taktang yokba ki nung bilemdangang." v4-5 Kibuba Tsüngremi Yihuda alitsü nenok asoshi iba mapang no?..Nenok lenmangtem nüburtem lenmang aisü nung kanga moaja aru saka parnoki item temoatsütem mezüngdangi pei taküm kibong asoshi dang bilema liasü. Tsüngrem dang tenlatsü aser Pa tenyaba mapa inyaktsü parnoki sendoka toktsüba ajanga parnok joko Tsüngremer temoatsü agi anünga akümba angur.

Temeimbatem, tanü asen kija kibonga kasa ola ajanga asenok lenmangtem ken bilemdangtsü ayongzüker. Tsüngremer tenyaba mapa junga inyakdar ma? Pa nem asen tajungtiba agütsüdar asü? Pai mulungba ama, Pa pelatsüsa asenok taküm lidar asü? shibai moatsüba, shiba lenisüba nung asenok kija kibong alir? Joko züba-züba alitsü mapang masü. Arung, asenok lenmangtem bilemdangdi aser Tsüngremer tiim teinyaktsü inyaka, asen mapa taküm ajongai Pa kulisüba nung shilem tajung agir kaka südi. Amen.

China nung Laishiba alemba atemaKhristan9jailnungpuoktsü

April 19, 2025: Inner Mongolia kübok Hohhot nung Laishiba ayokba aser Laishiba Khristantem jagisa, "Onoki alemba atema China nunger Laishiba nung ajenloka aliba jenjang nungjagi shilem 95-i obendang agütsüba den külemi senchi achi, ta International Christian Concern (ICC)-i metetdaksü.

Inner Mongolia ya China kübok aliba autonomous region ka lir.

China nunger Khristantemji küm 4 tashi tepuokdak ayutsü aser Yuan sen 500 nungi million 1 tashi senchi achitsü obendang agütsü.

China nunger Khristan 9 ji Wang Honglan, Ji Heying, Zhang Wang, Wang Jiale, Liu Minna, Li Chao, Yang Zhijun, Ji Guolong, Liu Wei aser Ban Yanhong nunger lir. Wang Honglan bo tamalen-a küm 5 tepuokdak liasü aser labor camp nung küm ka among. La kinüngbu Ji Heying-a tepuokdak ayutsü.

2021 küm April ita nung parnok mezüng apuba mapang nung parnoki, "Onoki tajangzük agitsü atema Laishiba ayoker masü saka jenjang tasak agi Laishiba alizükba sülen jenjang dalang agi ayoker mesüra

angati lema agütsür," ta metetdakja liasü.

Khristantem jagisa, "Onoki alemba atema China nunger Laishiba nung ajenloka aliba jenjang nungjagi shilem 95-i Laishiba alizüker aser shilem 75-i dang Laishiba ayoker. Onoki business atema masü saka osangtajung proktsü nükjidong nung inyaker," ta metetdakja liasü.

Khristantem jagi tim inyakyim ajanga Nanjiing nung adokba Laishiba alizüka liasü, iba sülen parnoki jenjang kanga ajemer ayok aser karbo angati lemshia liasü. Iba sülen 2021 küm parnok nem tai tonglokja apu, aser tawa parnok nem temerenshi obendang agütsüogo.

Khristantem jagi ozüng alema business inyak, ta aitsü. Khristantemji house church ka nung züngsemtem lir.

China nung sorkari melaba aser azüokba Three-Self Patriotic Movement nung Arogo ajak register asütsü tuyur, ajisüaka sorkar ketdangsertemi Three-Self nung register masüba house churches nung lenirtem aser züngsemtembo mapang shia mita aoer aser apur.

AO OSHI ANGAZÜKDAK:**TANÜ ANGAZÜKTSÜBA OJANG****Temenünga**

(n) tanük akümba (crushed)

* Tsük menüing dang temenünga jangnem aika alur.

Temenünütsü

(adj) pelatsüsa mesüra luja bilemetsüba mapa (funny)

*Tanü asüing asen lima nung temenünütsü mapatem aika ataloker.



Tir Yimyim

OLONG PAITEP # 7126

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

- Nisung jenti - (5)
- Tsük rudenba - (5)
- Temzüng tesashi - (5)
- S ____ i - (3)
- Nisung telemsa - (3)
- Anogoshi - (4)
- Ajanga aor - (4)
- Tsük rizüingdak - (3)
- Tebang nungi adokba - (3)
- Süingdong tatembangtiba - (5)
- Meputep - (5)

LANGTSÜNGLEN

- Tenük telong - (9)
- Committee dang ajar - (5)
- Yagi ki okdoker - (7)
- Yim lenmang - (5)
- Temoatsü keter meyipa aruba - (9)
- Kanga junga menemba - (7)
- Majinü - (5)
- Tzüma nung senzüba - (5)

OLONG PAITEP # 7126 TELANGZÜBA**TIPIEN :**

- Anükalem, 4. Mesak, 5. Epet,
- Meimtep, 11. Posü, 12. Patak,
- Tekettsü.

LANGTSÜNGLEN :

- Kümbang, 2. Ayak, 3. Leptep,
- Nati, 7. Yiar, 8. Sangküm,
- Metsük, 10. Mazü.

NAI-A YA METETTER MA

Alima nung jenjang tasaktiba ice cream ya Japanese luxury dessert brand 'Cellato' lir. Iba ice cream indang scoop ka jenjang JPY 873,400 (approximately \$6,696 or ?5.2 lakh) lir. 'Cellato' ice cream nung 'white truffle' enoka lir aser iba ya Alba, Italy nungi bener aruba lir.

Guinness World Records-i 'Cellato' ya 'World's most expensive ice cream' ta kuli agütsüogo.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tripura sorkar mapa 17,500 nung nisungtem aniokogo

Agartala, April 19, 2025

(Agencies): Tripura state sorkari department balala nung mapa 17,500 nung nisungtem aniokogo aser ano permanent jobs nung nisung 13,000 tema anioktsü ta Finance Minister Pranajit Singha Roy-i ashi.

"State sorkari zünger mapa manguba lanurtem nem tashishitsü melii sorkar mapatem agütsür. TPSC,

JRBT, aser tanga authorized bodies ajanga mapa nung shimoker. Iba mapa ya tesüiba küm 7 tashi inyaka arur. Sorkari rules aser recruitment policies den putepa iba mapa inyaker" ta Roy-i ashi.

Small Savings Inspectors tasen 11 shimokba sentong ka nung Finance Minister Roy-i iba osang metetdaksü.

"Small Savings Department ajanga

tongtipang mapa inyaker. Credit-Deposit (CD) ratio tajungba kümra iba ajanga bank temi senotsü teimba enokba sayur aser iba ajanga state nung terenlok mapa teimba inyaker. Centre aser state sorkartemi inyakba mapa aika bank tem ajanga inyaker aser iba department-i iba mapa repranger anungji state renlokba nung tongti shilem agir" ta paisa ashi.

APCC-i party züngsemtemi tim masüba bushisüingdangtsü

Guwahati, April 19, 2025

(Agencies): Assam Panchayat Elections nung ochimashi aser tim mesüi inyakba ken o tem atema Assam Pradesh Congress Committee (APCC)-i bushisüingdangtsü.

Congress party züngsemtemi tim mesüi inyak ta ken o tem adokba bushisüingdangtsü atema APCC-i züngsem aseme akümba luden ka tentetogo.

"Taoba Union Minister Paban Singh Ghatowar-i aniba ludeni Panchayat elections dak sendakba ken o tem bushisüingdangtsü" ta APCC President Bhupen Kumar

Borah-i ashi.

Panchayat election ticket alemba maparen nung ochimashi inyakogo ta district pungu nungi ken o 17 tashi benoka lir ta pai ashi.

AICC General Secretary-in-Charge Jitendra Singh-i party sasep nung tashishitsü melii inyaktsü aser tashi angatsü tetuyuba ka agütsüba sülen Borah-i luden shimba osang metetdaksü.

Panchayat elections nung ticket alemba nung tim masüba, sen yong ticket agütsüba, opposition candidates-i asaa election nung metoktepba, kuli

kecha melii nominations meyipa agiba aser party anema inyakba mapatem luden ajanga bushisüingdangtsü.

Committee-i party züngsem mashii ka mesüra tai tonglokja alir jaoka asüingdangtsü atshi tashi agütsür ta Borah-isa metetdaksü.

APCC-isa May 7, 2025 matongdang committee dang reprot agütsütsü tetuyuba agütsüogo ta paisa ashi.

Assam Panchayat elections ya May 2 aser May 7, 2025 anogotem district 27 nung agitsü aser May 11, 2025 nü votes azüingtsü.

Meghalaya nung kaketshir 13,000 tema scholarship mangur

Guwahati, April 18, 2025

(Agencies): Meghalaya Chief Minister Conrad K. Sangma-i anogo ka mesüra ana tsüingda scholarships agütsütsü ta nangzükba sülen ita ka süir saka kaketshir 13,000 tema nem scholarships magütsü lir.

Academic year 2023-24 atema Centre sorkari Post Matric Scholarship for Scheduled Tribe (ST) students kübok final installment Rs 85.07 crore agütsüogo ta March 22, 2025 nü CM Conrad-i metetdakja liasü.

Iba sangdong agüjaka beneficiaries aika keti ano sen matong lir. Directorate of Higher and Technical Education-i Aadhaar-bank account linkage maliba ajanga sen magütsüter ta ashir.

Kaketshirtemi yaküm nungi

scholarships angutsü yongyaseta arur aser sorkari January nung agütsütsü ta shir February ta melen aser tatamsa March nung agütsütsü nangzük. Tang tashi nung kaketshir 13,608 nem scholarship agütsüogo.

National Scholarship Portal nung Aadhaar dak sendakba timtem kar aliba ajanga kaketshir 13,719 nem senotsü magütsür. Parnok teimbaka Aadhaar den bank account sendaktepa mali ta

ketdangsurtemi ashir.

Education Department-i iba khuret reprangdar aser Aadhaar authentication o data mismatches indang tebilemetsütem koktettsü meranger ta shiogo.

Scholarship agütsütsü atema Aadhaar sendakteptsüba ya taküm mezüing inyaker aser Meghalaya Higher and Technical Education department atema tebilemetsü aika ngua itemji koktettsü meranger.

ALI TAYOKTSÜ LIR

- 3 Pura. Foothill road tangshia 150 per sq.ft
- Foothill anasa teak lu, 120 per sq.ft
- Showuba fly over anasa 190 / 250 / 310 per sq.ft

~ Contact : 9863826159

ALI TAYOKTSÜ LIR

Aoyimti road touch, Highway nungi feet 500 yir. (left side)

@ 730/- Per sqft.

Contact: 6009905256

Gaza nung Israel nunger sepaitemi nisung 64 tepset



Khan Younis kübok Nasser hospital nung nisung kati Israel nunger sepaitemi anüng ajanga amakba mapang tepsetba Palestine nunger tanur ka ajunger aoba noksa nung angur.

Gaza City, Rongchii/April 19 (Agencies): Hokolbar anepdang nungi Israel nunger sepaitemi Gaza amaka tenzükbä sülen nisung 64 tepsetogo, ta medical sources temi metetdaktüsügo. Kasa mapang nung United Nations' World Food Programme-i, Gaza nung tang chiyongtsü nüngdaker, kechiyong nisung meyirejang aika yatzüri agi meneptsü ana nung lir ta tekümdangtsü metetdaktüsügo. Al Jazeera sangdong ka ajanga ashiba agi, Israel-i anüng

ajanga Gaza maneni amakba ajanga iba tesem nung aliba nüburtem tekelok shisatsü animesüngzükteti lir aser Israel-i tenokdangba balala agütsüba ajanga chiyongtsü agi anünga lir. Kasa mapang nung Wafa news agency-i ashiba agi, Israel nunger sepaitemi occupied West Bank nung Fawwar refugee camp nungi Palestine nunger ti puogo. Sepaitemi iba camp amak aser nisung aika sota ayuba sülen nisung ti ya pua liasü. Wafa-isa, ki aika meitaogo aser iba mapang osettsütem aika raksatsüogo, ta

metetdaktüsü. Gaza kübok Rafah tesem nung amendaka aliba Kuwaiti Hospital nungi paediatrician Hazem Musleh-i Al Jazeera dang ashiba agi, Israel-i asendenshir iba tesem amakba ajanga tanurtem timba südar aser parnok health kanga mejungi akümtsü ana nung lir. World Heritage Day nü human rights group Al-Haq-i ashiba agi, Israel-i Palestine nunger indang cultural sites aika makogo, kong UNESCO-i World Heritage Sites ama züngoksema aliba tesemtem densema lir. Al Jazeera-isa, occupied West Bank kübok northern Bethlehem nung al-Makhroun tesem koba 2014 küm UN indang World Heritage List nung züngoksema liasü, iba tesem ya Israel nungertemi atsünga aotsü ana nung lir, ta Al-Haq-i ashi. Gaza Government Media Office-i ashiba agi, Gaza nung asürtem 61,700 jungogo. Media Office-isa, nisung meyirejang aika samara bushitepdar aser ita 18 raraba mapang nisung 1,16,505 yiruogo, ta metetdaktüsü.

Tunisia nung opposition lenirtem aika tepuokdaki yok

Tunis, Rongchii/April 19 (Agencies): Tunisia nung opposition lenirtem aika national security dak sendakba nung aija tepuokdak mapang talanglang ayutsü obendang agütsüogo, ta state media sangdong ka ajanga metetdaktüsü. Iba North Africa nung aliba linük nung opposition yimden yimsüsür tejentem aika Honibarnü nisung 40 tepuokdaki yoktsü obendang agütsürtem rongnung densema lir. Parnok rongnung taoba justice minister ka aser diplomat tem densema lir. Ken o asadangertemi ashiba agi, item lenirtem aitsüba ya inyakba dang nungi talila aitsüba lir aser iba ajanga tir Kais Saied-i tashi tali amshia yimsü asüba sayur. TAP state news agency-i ashiba agi, lenirtem nem küm 13 nungi 66 tashi tepuokdak ayutsü obendang agütsüogo. Anti-terrorism prosecutor indang office nungi ketdangsür kari ashiba agi, defendants tem yagi state security anema jenjang agiba ngutetogo aser parnok ya kiralongrar telok ka nungi liasü, kong Saied yimsüsüba anema bendanger tashitem den longjemer inyakba densema lir, ta Jawhara FM-i metetdaktüsü. Obendang agütsüba dak sendakba nung osang tejangja memetet. Nisung kwi obendang mesüra parnok koba ken o nung ajemdaker aitsü item indang osang tejangja memetet. Maneni Honibarnü nisung 40 tepuokdak ayutsü obendang agütsüba ya joko küm ana shi obendanga arurtem asü masü aser parnok aibelenba nguteta tepuokdaki yok asü masü

mejangja. Parnok 20 shi shirnok timba Tunisia toktsür jenaogo, parnok linük nung meliaka tepuokdak ayutsü obendang agütsüogo, kong French intellectual, Bernard-Henri Levy-a densema lir, shiba defendant aser bendanger teloktem sendakteptsür ama inyakba atema aitsüogo. "Tir Saied-i Tunisia indang judicial system ya yimden yimsüsüba nung opponent aser pa anemertem anema hadir ka ama amshidar aser pai kuli tejangja makai nisungtem tepuokdaki yokdar," ta Human Rights Watch nung deputy Middle East aser North Africa director Bassam Khawaja-i iba ita Al Jazeera dang ashi. Hokolbarnü nikongtsütsü defence lawyer temi obendang ya tim masü ta shiogo, kechiyong obendangeri taitsüba zünga ashiba sülen prosecution mesüra defence nungi ken o kecha mangadangi obendang agütsü tenzükbä. "Kü taküm tepeyong nung ni iba amala obendang ya mongudangka. Iba ya jilushika, obendang renema lir aser kechi ataloker iba ya ochi mashi inyakyim ka aser taktüsüka lir," ta obendang Ahmed Souab-i ashi. Ketdangsürtemi defendant tem aitsüogo, kong taoba mapang intelligence tekolakba Kamel Guizani aser osangbener tongtibang ka densema lir. Parnok ya linük mesüngjemteti kümdaktüsü aser Saied atsüngtoktsü merangba atema aitsüogo. Issam Chebbi, Ghazi Chaouachi, Said Ferjani aser Jawhar Ben Mubarak nunger

densema defendant tem aika 2023 küm apuba sülen custody nung yua lir. Chebbi ya opposition National Salvation Front coalition züngsem ka liasü. "Ketdangsürtemi opposition tem ozüng raksartem kümdaktüsüner," ta Chebbi-i Hokolbarnü. Saied-i pa dang dictator ajaba magizüki arudar. 2023 küm pai ashiba agi, aija aliba yimden yimsüsürtem ya linük ashioktsürtem aser kiralongrartem lir aser aser obendanger shirnokisa parnok chiokdir parnoka parnok nem teyari agütsür ama züngshitsü. 2021 küm parliament loksaja iba mapang Ato Kilonser mapa nungi anentsüba sülen Saied-i pa jenjang yanglushia liasü. Ken o nung sendaka aliba opposition lenirtemi sorkar coup asütsü merangba atema pa aija liasü. Parnoki ashiba agi, opposition tashi meite kümdaktüsü aser nisung kati dang yimsüsüba ka amenoktsü atema parnok anema ken o benoka liasü. Tunisia nung nüngtugu opposition lenirtem karbo tepuokdak yua lir. Ennahdha tekolakba Rached Ghannouchi 2023 küm April ita apu aser sorkar anema apusotsü atema ajungmesoba atema pa küm ka tepuokdak ayutsü obendang agüja liasü. Taküm küm tetenzüklen pa küm 22 tepuokdak ayutsü obendang agütsü, kong state security anema nokdakba atema aitsüba densema lir. Maneni par party-i bendanglen nungi senotsü teyari agizük ta shia pa ano küm asem atema tepuokdak ayutsü obendang agütsü.

Office of the
MERANGKONG IMSONGUNGER KIDONG TULI UNIT
P.O: Tuli-798618, Dist: Mokokchung, Nagaland.
TETUSHI AGÜTSÜR

"Kong temulungtetba lir yangji lenmang lir" shin o nung shia aliba ama züngtettsü asoshi temulungtetba yur azüngba süngjang tangteta kidong telungjem nungi züngsem Sb. PUNAZÜNGBA IMSONG, Wb. Jongpongyanger Imsong aser Wt. Chubarenla jabaso, pai Nagaland University kübok nungi Doctor of Philosophy in Chemistry renemteta takok tajung ngutetba asoshi tenüngsang aser tetushi agütsür. Maneni tarutsü wadang aser jenjang takok tajung ngudakjang ta sarasadema atar.

Sd/-
Yashitoba Imsong
President

Sd/-
Limameren Imsong
Secretary.

MOLUNGNEN O

Aso: 06.05.1937 ~ Asü: 13.04.2025

Onok asür Engendangla'er kinungertemi onok mangyim jashi mapang nung aliba mapang kija, lokti, Arogo, lokti tentet, kiyonger aser temeimertem kwinakati onok den temeim lemsatepba den sarasadem ajanga nongita yariogo, nenok ajak dang dang kanga pelaba lemsateper. Nenok ajak dangi tsüngtong arua tepela melemsatetaka tulusang Tsüngremi nenok ajak molamoshia moajang ta ozü sarasadem. ~ Temeim Chirnur, Semchisemnur, anükapang aser kinungertem.

Office of the
LONGMISA SENSO MUNG DANG
P.O Mokokchung - 798601 B.P.O Longmisa
Mokokchung : Nagaland

TENÜNGSANG AGÜTSÜR

Wb. Wapanglemba Y Lemtor (S/O Wb.Yashitemjen Lemtor & Wt. Nungshisula Jamir M.Sc.(Agri) Agricultural Economics nung Gold Medal jenjang ajangzüktetba asoshi LSM ajanga konang tetushi tenüngsang tulu agütsür. Teyanglur Tsüngreminu taküm tarutsü anogotem nunga temoatsü nung len ania moajangma.

Sd/-
Pangersosang
President LSM

Sd/-
ISenkanungba Ao
G.Secretary LSM

OFFICE OF THE
PATIZUNG WARD COMMITTEE
TULI TOWN
P.O. Tuli – 798618
Dist. Mokokchung : Nagaland.

TENÜNGSANG AGÜTSÜR

Patizung Ward sanger ajak tenüng nung **Dr. Punazungba Imsong** (Merangkong Village) S/o Wb. Jongpongyanger Imsong aser Wt. Chubarenla tena jabaso ajanga Doctor of Philosophy Chemistry nung thesis **"Synthesis Lanthanide Nanoparticles : Characterization through Crystallography and Spectral Techniques along with their applications,"** Nagaland University nungi takok tulu anguba asoshi konang nungsang tulu agütsür. Maneni nü takum aser wadang ajak nung Tsüngremi lenisüba denang ta sarasademtsür.

Sd/-
Talitemsu,
Chairman,
Patizung Ward Committee.

Sd/-
Imliwapang,
Secretary,
Patizung Ward Committee.

Kolkata Knight Riders nung Abhishek Nayar denogo



Rongchii/April 19, 2025

(Agencies): Abhishek Nayar Indian Premier League-i meyipa arua Kolkata Knight Riders (KKR) nung support staff ama denogo. 2025 season nung kanga tongtibang mapang ka nung pa club nung denogo.

KKR-i pa club nung adenba osang ya Honibarnü jangjatsüogo aser ashiba agi, taoba mapang India team nungi all-rounder asayar ya kasa anogo Eden Gardens nung training session nung adentsü imlar.

Club nung adenba sülen

Nayar aser IPL asemben tashi koker aliba team na tanaben longjemogo.

Taoba mapang pa team nung inyaka aliba mapang KKR nung asayar aika anitetba nung Nayar-i tongtibang shilem agia liasü.

Lanur asayar Shubman Gill, Venkatesh Iyer, aser Varun Chakravarthy nunger ajak pa lenisüba nung kanga dang asayar tajung kümogo aser parnok technique aser temperament atema ajaki tenüngsanga arudar, koba

Nayar indang mentorship yimya jungkai adokba ka lir.

Pa India national team nungi tuguba sülen mapang tatsüka dang lir KKR nung denogo.

2024 World Cup sülen pa head coach Gautam Gambhir-i assistant coach asütsü shim aser Nayar indang contract ya May ita tashi liasü.

Ajisüaka New Zealand aser Australia na nung atonga Test asayamung makokba sülen BCCI-i coaching staff melenshitsu telemetba agia Nayar, fielding coach T Dilip, aser S&C coach Soham Desai nunger mapa nungi anentsüogo.

Nayar mapa nungi anentsüba indang BCCI-i sangdonga mali, saka pa mapa nungi anentsüba ya KKR asoshi mapang shitak ka ama bilemer.

League nung tang kanga toktepba asayaba aser playoffs atongsü lia Nayar amala temulung adokba nisung ka züngosemba ajanga kanga dang nüngdaka aliba teyari agütsütsü.

Pa Gambhir den kanga junga inyakba aser iba den KKR tamendakdak kanga junga meteta aliba ajanga iba tongtibang mapa agizüktüsü atema temsüa kümdaktsür.

Major League Cricket nung Warner Seattle Orcas nungi asayatsü

Rongchii/April 19, 2025

(Agencies): Taoba mapang Australia nunger nüngtugu cricket asayar David Warner, 2025 Major League Cricket season atema Seattle Orcas nung denogo. Iba asayamung ya June 12 nungi July 13 tashi asayatsü.

Taoba küm June ita international cricket asaya nungi anisüngzükbaba sülen Warner tang mezüngbuba USA nung asayaba iba T20 league nung ya asayatsü lir.

International league balala nung asaya 401 nung run 12,956 yanglua asayaba sülen Warner T20 asaya nung tajangshiba aikabener Orcas nung adentsü, koba parnok asoshi tajangzükbaba asütsü.

Warner ya tang Pakistan Super League nung Karachi Kings nungi asayadar. Pa iba team captain lir. Pa lenisüba nung tawa Sydney Thunder pur Big Bash League final

asayaogo aser pa ya iba asayamung nung run timtiba yanglur rongnung tanabuba liasü. Pai asaya 12 nung run 405 yanglu.

Asayar tejen ya February ita ILT20 asayamung akokba Dubai Capitals nungi asaya liasü. Ajisüaka pa IPL 2025 auction nung shingaia malizük. Pa 2009 küm nungi IPL nung asaya aruogo aser iba mapa asaya 184 nung run 6,565 yanglua pa iba asayamung nung run timtiba yanglurtem rongnung pezübuba süaka taküm team kati danga malizük.

2023 küm mezüngbuba MLC asaya Seattle Orcas puri amokbanger asaya aser parnok league table nung temaba jenjang nung liasü, saka final nung MI New York mekoki liasü.

Tanabuba season nungbo Heinrich Klaasen lenisüba nung parnoki asaya tenet nung asaya ka dang koka liasü.

Cardiff-i caoch Riza mapa nungi anentsüogo

Rongchii/April 19, 2025

(Agencies): Cardiff City-i coach Omer Riza mapa nungi anentsüba sülen Wales captain Aaron Ramsey-i Championship season tanungba atema coach mapa bena atatsü.

Sheffield United den asaya mekoki Cardiff pur Championship relegation-i point ka agi dang mai aliba mapang iba telemetba agiba ya Riza nem Honibarnü metetdakja liasü.

Arishi küm 34 tain Ramsey lenisüba nung Cardiff pur Hombarnü mezüngbuba Oxford United den Cardiff City Stadium (15:00 BST) nung asayatsü.

Pa nem taoba mapang Wales team-mate aser tang Wales Under-19s manager Chris Gunter aser Bluebirds midfielder Joe Ralls nati teyari agütsütsü.

Gavin Ward maneni goalkeeping coach asütsü aser under-21s coach Matt Bloxham aser under-18s manager Tom Hutton nata technical staff nung densema alitsü imlar.



Omer Riza

"Cardiff City manager inyakba mapang Omer-i tejangraba tulu nung meranga inyakba atema onoki pa dang kanga pelar aser tarutsü nung takok nguyonga aotsü imlaja atar," ta club sangdong ka ajanga metetdaktsü.

Ramsey-i tang tashi nung coach mapa inyakdanga mali, saka pai joko mapang tatsüka coach inyaktüsü jangra aruogo aser Wales coach Craig Bellamy-ia, asaya nungi anenba

sülen pai temaba jenjang nung inyaktetsü ta shia liasü.

International asaya 86 asayar alisang ya tang asaya aliba season nung Cardiff indang coach tasembuba asütsü. Mezüng Erol Bulut liasü, saka pa lenisüba nung mezüngbuba asaya trok nung ka dang akokba sülen pa mapa nungi anenja liasü.

Taoba mapang Watford coach Riza, shibai taoba küm Bulut nem teyari agüja liasü, pa caretaker ama shim aser iba sülen December ita contract agüja liasü.

Ajisüaka Cardiff puri junga masayatetba sülen pa kanga nongshia aruogo. Club kiburtemi taoba ita melenshitsu tebilemba liasü aser pa melen taoba manager Neil Warnock shimtsü asadang, saka kibur Vincent Tan-i Riza pusema liasü.

Ajisüaka Hokolbarnü Bramall Lane nung goal 2-0 agi tamakok anguba sülen fans temi Riza mapa nungi anentsütsü akhangba anga-a pa mapa nungi anentsüogo.

Munich Open: Alexander Zverev semifinal-i iogo



Alexander Zverev

Rongchii/April 19, 2025

(Agencies): Germany nunger world number three asayar Alexander Zverev-i tang asaya aliba Munich Open nung Tallon Griekspoor koka, küm tenet nung tang mezüngbuba semifinal tongtetogo.

Zverev-i iba asaya ya set ka agi mekoki aliba nungi meyipa tur 6-7 (6/8), 7-6 (7/3), 6-4 agi asaya koka semifinal tongtetogo aser takok angutsü timla lir. Pai 2017 aser 2018 küm iba asayamung koker lir.

Griekspoor shibai taoba ita Indian Wells nung Zverev tsükdakja liasü, pai tanabuba set nung 5-4 ta aliba mapang asaya akoktsü atema serve asü saka pai junga masayateti Zverev nem kokdakja liasü.

"Iba asaya akokba atema kanga pelar. Pai tactically kanga junga asayaogo, koba kü atema kanga tasak liasü," ta Zverev-i Sky Germanydang ashi.

"Tanü ni tera agi dang takok ngutetogo. Imlar asüng tajungba

asayatsü," ta paisa ashi.

Zverev semifinal nung Hungary nunger Fabian Marozsan aser Belgium nunger Zizou Bergs na asayaba sülen takoker den asayatsü.

Pai iba asaya kokra, Deobarnü pa arishi küm 28 ajungaba nü iba asayamung tasembenbuba akoktsü.

Kasa mapang nung semifinal-i ano world number 15 Ben Shelton-a iogo, shibai Italy nunger asayar Luciano Darderi 6-4, 6-3 agi kokogo.

Shelton semifinal nung Argentina nunger asayar Francisco Cerundolo den asayatsü.

Arishi küm 22 tain asayar yagi taküm tang agi tanabenbuba semi-final ka tongtetogo. Pai January ita Australian Open nunga semifinal tonga asaya saka Jannik Sinner-i straight sets nung tsükdakja liasü.

Cerundolo-ia, 6-2, 6-4 agi David Goffin koka semifinal tongtetogo.

Nagaland Olympic Association-i asükhu lemsatep

Dimapur, Rongchii/April 19 (TYO):

Nagaland Olympic Association-i sangdong ka ajanga, Department of Youth Resources & Sports kübok Archery Coach Hünezö Thisa asüba osang angazüka mang ayimba lemsatepogo. Pa ya Nagaland Archery Association nung ketdangsür

ka liasü.

Thisa ya Nagaland nungi National Games nung gold medal anguba mezüngbuba asayar liasü, koba pai 1994 küm Maharashtra nung ngua liasü. Kümtem tsüngda pai asayar aika anitetogo, shirnok Nagaland tenüng nungi national aser regiolan jenjang nung asayaogo. Pa mapa

tajung asoshi pa nem Dr. T. Ao State Sports Award for Coaches naroküm agüja liasü.

Nagaland nung Olympic movement tenüng nung Association-i asür kinungertem den asükhu lemsatepba den pa tanüla teti tatem makadak anisüngzükdakjang ta sarasademtsüba kasa sangdong ajanga lemsatepogo.

BILEMDANGANG

"Easter ya timla, asüngsashi aser taküm tasen temaitsü lir."